

欽定剿平粵匪方略

欽定勦平粵匪方略卷十二 壬子年

四月初二日 壬午 程裔采奏言 臣前准廣西撫臣

飛咨逆匪竄撲桂林當卽在於各處防兵內抽撥一千名咨會提臣余萬清帶赴粵西會勦並查明楚境各要隘緩急情形分兵堵禦楚邊卡隘共有五六十處之多昨因粵省告援先於防兵內抽撥赴勦本境愈形單薄是以復於南北

兩省續調官兵三千五百名催令先後趕來一俟到齊再以一千名赴粵仍以二千五百名補防俾昭慎重以現在情形而論逆蹤北竄固距江永稍遠而零陵東安新甯城步綏甯等縣轉爲切近是楚疆防堵較之前踞永安時尤爲喫重業將派防江永之道員張其仁派防宜章之總兵孫應照一併飭駐永州府城以壯聲勢至

提臣鮑起豹駐守江華縣本屬邊界要區此時
應毋庸移動庶與臣互相控制策應易周現又
酌調鄖陽竹山施南黃州德安荊門各標協營
兵一千名飭令星速來南分別添派堵禦奏入
報

初六日丙戌賽尙阿奏言竊省城重地被逆匪攻

圍多日雖城中守禦暫保無虞並連次出擊獲
勝而賊鋒未能大挫城圍未解臣自駐營陽朔
嚴飭城外赴援各軍悉聽向榮號令並飭向榮
設法調遣臣現在以二千兵勇駐紮陽朔將所
有各路兵勇二萬餘全數飭赴省城援剿陽朔
爲省南首站地方衝要當賊回竄平樂梧州水
陸總口且據向榮屢次函稟皆以賊於省河擄

得船隻將婦女輜重米穀運載其中刻防該逆
順流而下則朔邑係必由之路最爲喫緊當將
兵勇分布各處陽朔三面皆山路徑紛歧處處
可通荔浦逐日於各要路築壘挖濠紮營分駐
並採買米穀接濟桂林城外赴援各軍糧食省
外毗連各郡邑經臣駐朔一軍嚴鎮亦漸覺人
心安定惟是省城被賊攻擾已及兩旬城外諸

軍數已萬餘而地方遼闊分紮各處猶形單薄
逆賊連日攻戰極盡鬼蜮伎倆非大加勦洗未
能折其兇鋒且尤慮其不獲逞於省垣則由平
樂梧州等處北竄楚南東逸粵東蔓延可慮省
城南路空虛將軍橋一帶本賊最先竊踞之所
必須厚集勁兵由此攻擊再由城內出兵會合
方期得手專候張國樑勇到會同東勇由此路

銳力進攻張國樑赴省必須經過陽朔俟其一
到卽當嚴飭飛速赴省仍飭省城內外諸軍併
力合謀進剿以期一鼓奏功奏入

上命軍機大臣傳諭賽尙阿曰逆匪尙在圍攻省城各
處兵力聚於北路該大臣駐紮陽朔省南兵力稍單
本日已飭令四川雲貴各再挑備精兵二千該大臣
如有應需調遣之處卽一面奏聞一面飛調應用鄒

鳴鶴向榮等守禦省城現與該大臣聲息相通除軍事隨機應變不及往返咨商外其舉劾等事仍當統歸欽差大臣具奏鄒鳴鶴赴任時卽以辦團練爲己任現在賊竄省城六塘九塘一帶毫無守禦而前奏省城團練五萬人似亦並無實際著卽會同徐廣縉密查該撫儻有夸大粉飾遇事張皇情事卽行據實叅奏

上又命軍機大臣傳諭徐廣緒曰據賽尙阿鄒鳴鶴先後馳奏省城戰守情形該匪竄徧省城雖屢被攻擊而勢尙猖獗時已兼旬賽尙阿駐紮陽朔僅有兵勇二千陽朔爲省南衝要重地聞賽尙阿現在患病頗形委頓朕心甚爲焦急本日已明降諭旨令徐廣緒遴選精兵馳驛前赴廣西會同賽尙阿籌辦軍務該督接奉此旨著卽迅速帶兵前往現已諭知徐澤醇

吳文鎔等各選精兵二千聽候調遣該督酌量如需
此項兵力卽一面奏聞一面飛調但不可專待遠兵
致誤機會該督行抵廣西如賽尙阿病勢難支卽將
欽差大臣關防接領任事至鄒鳴鶴舉行團練未有
成效經理糧餉是否覈實著會同賽尙阿密行察訪
如有夸張粉飾等情卽據實奏參

上又命軍機大臣傳諭徐澤醇吳文鎔蔣蔚遠曰廣西

軍務未竣兵力尙單急需添調著徐澤醇吳文鎔蔣
爵遠於四川選備精兵二千名雲貴選備精兵二千
名並派得力將領員弁妥備軍裝器械聽候調遣

上諭內閣曰著派徐廣縉揀帶精兵馳驛前赴廣西會
同賽尙阿辦理軍務

賽尙阿又奏言副都統烏蘭泰被敵傷重於三
月二十日寅刻身故該副都統秉性忠誠素知

兵法詎意陣前猝遭傷挫遂至捐軀且其家本
赤貧數代單傳尙無子嗣情形實堪惻憫仰懇
照陣亡例從優議卹奏入

上諭內閣曰都統銜廣州滿洲副都統烏蘭泰自上年
派赴廣西勦辦逆匪屢著戰功昨因追擊賊匪身受
敵傷方冀調理速痊藉資倚任遽聞溘逝軫惜良深
加恩著照都統例賜卹任內一切處分悉予開復並

賞銀一千兩由廣東藩庫交伊家屬祇領送柩回旗
著沿途地方官妥爲照料並准其入城治喪烏蘭泰
現無子嗣著該旗於本族近支內擇其應繼之人卽
爲立嗣應得卹典該衙門察例具奏

初七日

丁亥

上諭內閣曰昨降旨將烏蘭泰照都統例賜卹因思逆
匪初撲省城烏蘭泰督兵直至城下已據將軍橋要

隘乃因礮傷入骨甫及兩旬遽致殞命深堪憫惻烏
蘭泰著加恩照陣亡例議卹以慰忠魂

十一日辛卯程裔采奏言廣西省城被圍已至二

十餘日兵勇疲乏居多前調鎮筸綏靖沅州保
靖各標協營兵一千名陸續抵永當派委遊擊
傅振邦帶兵六百名於三月二十八日星夜兼
程前往尙有兵四百名日內到齊豫派都司武

昌顯管帶赴援統歸提臣余萬清調遣楚境邊
防自當督飭文武加意圖維未敢稍存懈怠又
臣駐紮之處前聞永安潰竄卽已再四妥籌零
陵切近桂林策應固便但其餘邊要實多如僅
駐守偏隅轉有鞭長莫及之慮衡州地尙適中
堪資兼顧奏入報

聞

十三日癸巳賽尙阿奏言查此次逆匪竄出平樂

荔浦等處並未有賊竄匿現在省城兵勇除向
榮及劉長清等所帶湖南廣西四川官兵在城
內分門防守外王錦繡松安等兵與李孟羣等
勇均紮省北門外張敬修勇改紮北門外迤西
之飛鸞橋潮勇三千紮老西門外沿城地方秦
定三常祿兵勇紮省東門外對河之上關提督

余萬清已帶楚兵一千名馳抵省城北門外紮營惟南路空虛僅許祥光委員朱啟仁等勇紮六塘一帶遙爲聲勢賊於城西之甘橋圈門腳五里墟一帶將民房盡行占踞南門文昌門外亦有賊衆分踞文昌門外之張氏宗祠及臨江之象鼻山上兩處均有賊礮臺又於象鼻山下灣泊擄得民船數十餘隻婦女輜重悉載其中

圈門腳後有古牛山賊於其上登高瞭望可以
窺見城中賊目分住西南門外自十九日潮勇
勝賊福山腳後二十日向榮令謝繼超帶領提
勇擊賊於獅子巖二十一至二十六等日李孟
羣督帶良勇與萬明魁張敬修等勇均由飛鸞
橋進攻嗣後皆因雨阻未能出隊現在各路兵
勇全往省城如賊再竄亦必須由省城豫派兵

勇追襲各處地方緊要均不可再有疏失一俟
勞崇光帶領張國樑等勇到來卽飭由省城南
路相機前進仍飭向榮督飭城內外諸軍於此
項壯勇到後務卽約期併力痛剿奏入

命軍機大臣傳諭賽尙阿曰賽尙阿駐紮陽朔兵力
尙單本日諭令季芝昌揀選汀州漳州泉州各屬精
兵三千名聽候調遣惟坐待各省徵調赴援尙需時

日省垣被圍卅月萬無株守孤城一無展布之理南
路空虛尤須精悍兵勇接濟勞崇光旣經兼程前來
該大臣卽可與之籌酌出奇制勝之策令其在南路
協同攻勦杜賊回竄省城內外兵勇不下二萬餘人
卽著專責向榮劉長清等妥籌布置與勞崇光南北
夾擊凡西門南門外分占之處與象鼻山上下所築
礮臺及賊黨婦女輜重船隻必須隨地相機攻擊固

不可冒昧輕試尤不可坐誤事機若鄒鳴鶴專恃向榮爲長城向榮又藉堅城爲坐鎮賊來不能擊之使去賊竄又恐其復來困守待援豈桂林一城外皆不顧耶徐廣縉未到粵西以前該大臣務當通籌全局責成向榮勞崇光等分飭文武員弁併力合剿省城固屬緊要他處亦不得再有疏虞何路員弁兵勇不能得力卽惟該處統兵大員是問

上又命軍機大臣傳諭徐廣縉曰昨有旨飭令徐廣縉
馳赴廣西會同賽尙阿督辦軍務諒該督接奉此旨
必已星馳就道惟前飭揀帶精兵曾據奏稱廣東防
剿喫緊兵力難分本日已寄諭季芝昌令簡派汀漳
泉等屬精兵三千名以備該督調遣桂林省城現尙
被圍據鄒鳴鶴奏賊匪約祇五六千人省城兵勇二
萬不爲不多斷無株守坐困之理已飭賽尙阿督同

勞崇光向榮等相機夾擊該督如馳赴粵西卽會同
妥籌辦理

上又命軍機大臣傳諭季芝昌曰廣西軍務未竣已諭
令徐廣縉帶兵馳往會同賽尙阿籌辦福建汀州漳
州泉州等處兵力向稱驍勇且與廣東潮州各屬毗
連著季芝昌於提鎮各標內挑選精兵三千名聽候
賽尙阿徐廣縉咨調

十六日丙申賽尙阿奏言接據鄒鳴鶴及向榮函

稟三月二十七日四鼓賊用四輪檔車多架乘
夜直撲城下勢極兇猛守城及巡城官兵奮力
拋擲火藥火罐將其檔車焚燒斃賊無數紛紛
敗退同時又有賊匪用槍礮攻撲東西兩門黎
明時復撲西南及文昌門皆爲兵勇擊退二十
八日賊千餘人過東門對河由花園里繞李家

嶺分股來撲總兵秦定三常祿侍衛開隆阿等新營並於五通廟後地方埋伏賊匪數百秦定三開隆阿等帶領兵勇從貓兒山兩路分出見賊在花園里一帶搖旗擁來兵勇向前攻打並由兩邊圍抄賊衆不能抵敵當卽敗走兵勇飛追殺賊數十名追至花橋賊匪紛紛撲河淹斃不少秦定三開隆阿恐賊隔河埋伏紮住兵勇

將隊撤於貓兒山後俟賊復來衝出齊攻少頃
賊果由花園里楊家碑菜園三股分來每股數
百當令楚勇潮勇迎敵菜園之賊博白勇迎敵
花園里之賊各營迎敵楊家碑之賊賊又敗奔
兵勇復追至花橋河干斃賊多名開隆阿等令
兵勇將附近賊巢燒燬提督余萬清派兵過河
接應均各回營二十九日有賊數千從棲霞寺

一帶前來兵勇仍由貓兒山分路而出賊衆由福隆墟橋衝至秦定三開隆阿等令兵勇於各土埠豫伏擡礮先令博白勇誘敵有手執大黃旗一賊拌命直前羣賊布開衝出開隆阿督兵勇奮力向前攻打兩邊伏礮齊發衆賊慌張敗走執旗一賊猶挺立不動兩旁圍繞數十餘賊秦定三開隆阿等令兵勇向前拋擲火彈衆賊

擁護奔回開隆阿等親督兵勇追殺前浙江知縣江忠源等各帶官兵及博白勇分路尾追三面圍殺賊衆紛紛倒地生擒及撲水過河淹斃者計百餘人隨將楊家碑菜園一帶賊巢燒燬銀沆萬明魁等帶領福勇荔安勇由陸路張釗等駕小船分隊由水路進攻下關之賊並約秦定三等出兵接應賊船十餘正泊關雞山西岸

張釗等船俱到卽時開礮打破賊船賊衆敗走
遙見騎馬二賊飛馳在文昌門外雷祖廟一帶
調出黃旗數十至關雞山下抄來張釗等將艇
順流放下關雞潭東岸對河用礮轟打斃賊多
名相持約有兩時忽見賊後岸上火起料係銀
沆等勇接應賊衆蒼黃遁走初一日城內外礮
聲不斷是夜賊已分股一由東路關雞山駕艇

過河焚燒歐家村走江東背後扯綫路而去一
由西路廟頭墟黃塘而去城外諸軍甫將大集
方期四路併力就此一鼓蕩平詎逆賊知我後
路勁兵齊至乘夜分投他竄查廟頭墟路通義
甯該縣城小無兵且距省城僅五十餘里賊蹤
飄忽俄頃卽至前界龍勝可出湖南武岡等境
江東扯綫路北走興安東走平樂富賀各通湖

南廣東亦可南走陽朔在在均須扼截秦定三
開隆阿等一軍已自省城對河跟追江東賊股
當卽飛札令其就近馳追除留兵防守省城外
速撥兵勇拔營分投追剿已革總兵李能臣帶
領博白壯勇千名馳赴義甯並飭朱啟仁所帶
東勇會同由六塘探明追剿張國樑帶勇千名
初二日晚間趕到飭令卽赴省東南路之沙子

街堵剿查該處爲平樂恭城灌陽興安四達之
衝該壯勇等到彼最爲扼要其餘壯勇到齊亦
令陸續前往張釗礮船調回順流駛下平樂並
飛咨湖南廣東各於交界嚴防竄越平樂義甯
兩處尤爲切近所冀省城兵勇亦如前在永安
州時立即派撥跟追則兩處城守或可無虞疏
失賊竄地方皆通湖南之路程喬采自帶重兵

防堵楚境賊果竄越定可迎頭截住較之竄由
粵省各府州縣未有重兵防堵者轉可放心且
該逆如果勢分我軍又添湖南調來新兵及南
邕等壯勇合計五六千人從後分投追截如能
與楚省防兵前後夾擊似較賊聚一處時我軍
四圍密布動覺兵單者或轉易於蕲事臣惟有
嚴催各路追剿之兵不許片刻稍遲使賊所到

不得喘息俟其奔突一有定向再飭諸軍分投
繼往前截後擊庶可乘機力圖殄滅

賽尙阿又奏言接到向榮稟函逆賊於初一夜
二更後先於象鼻山點放火箭亂射入城又於
文昌門西門轟打槍礮無數四更時五里墟圈
門腳忽起火光向榮與撫臣上城查看知賊已
走當卽商派新到湖南廣西四川雲南各兵勇

並提勇博勇等共七千名統歸劉長清余萬清
督帶追剿該逆於初二日丑刻由關雞潭下之
衛家渡過河約有五六千衆盡向伶仃坪而去
又有說傳賊由西二塘竄赴義甯柳州去者向
榮本欲自追撫臣及省城紳民挽留仍守省城
當與撫臣會咨各提鎮趕緊帶兵卽由省城東
北一路追剿並探明該逆是否欲竄湖南卽行

飛稟等語查與臣所得探報稍有不同其過河東竄一路則已符合至義甯一路雖據函稱係屬訛傳臣探報言廟頭墟路分竄之賊較少而該縣距省最近且通柳州湖南尤恐逆賊聲東擊西似亦宜加防範奏入

命軍機大臣傳諭賽尙阿曰逆匪圍攻桂林省城已踰一月屢次爲我兵擊敗於四月初一日夜開分投

他竄據該大臣探報一由東路關雞山過河一由西路廟頭墟黃塘而去與向榮所稟情形雖稍有不同而其過河東竄一路已偵探明確在粵西則平樂一帶最爲喫重而湖南廣東交界處所尤爲緊要其義甯一路亦與楚壤相接賊勢分竄無定該大臣務當密飭統兵大員於跟蹤追剿之時詳加偵察處處接應現在我軍統計兵勇七千名均歸劉長清余萬清

督帶追剿兵力不爲不厚正可乘賊勢分散喘息未
定一鼓蕩平桂林省城解圍固須防賊回竄紳民挽
留向榮守城亦係人情之常惟鄒鳴鶴坐鎮省垣督
同留守防兵及紳民等嚴密巡護亦可有備無患向
榮勇敢素著自應於城外扼要地方督兵爲各路聲
援使賊不敢回竄且可相機進剿較之株守省城更
爲得力著賽尙阿隨時調度勿誤事機

上又命軍機大臣傳諭程喬采駱秉章徐廣縉葉名琛
曰逆匪圍攻廣西省城於四月初一日夜聞分投竄
逸廣西東北東南一帶與廣東湖南緊相毗連必當
協力防堵著程喬采駱秉章徐廣縉葉名琛督飭文
武員弁認真巡防嚴密堵禦毋任賊匪闖入並隨時
偵探賊蹤或於要隘處所迎頭截擊或越境協剿相
機進攻總期速靖賊氛勿致蔓延貽患

上諭內閣曰逆匪水陸被剿於初一日夜分路逃竄桂林省城解圍現在向榮駐守省城余萬清勞崇光均各趕到著賽尙阿卽飛催各路文武督率兵勇分投追剿並著程喬采徐廣縉等飭令文武於交界處所嚴防竄越勿令逆燄復張

十八日

戊戌

上諭內閣曰廣西自軍興以來在事文武各員志切同

仇竭忠矢報其有臨難捐軀舍生取義者朕於奏報到日無不立沛恩施優加卹典因念陣亡各總兵之子孫尙未盡邀賞賚著該旗及各省督撫查明廣西陣亡各總兵子孫有無官職年歲若干分別開單先行具奏俟孝滿服闋時由該部旗帶領引見候朕施恩至於守土各員隨征將弁以及兵丁鄉勇殺賊殞命業已隨時交部議卹其父母妻子茆獨無依尤堪

欽定四庫全書
卷一百一十二
三十一
矜惻著各該旗都統及各省督撫等轉飭該管各員
逐一查明加意撫恤毋令失所用副朕推恩忠節有
加無已之至意

臣等謹案軍興以來死事諸臣及傷亡兵勇
已得

旨下部議卹

褒忠之典備極優隆猶復

塵念行閒

推恩忠節或錄其後嗣或贍其室家所以

體恤而矜全之者無微不至此忠義之士所爲奮不顧
身誓滅賊以報

國恩也

同日

上諭內閣曰陣亡都統銜廣州副都統烏蘭泰著加恩

賞給輕車都尉世職其應繼子嗣著於百日孝滿後
該旗卽行帶領引見

二十日庚子程喬采奏言探得粵逆竄至海陽坪

初五日攻撲興安縣城初六日卽進撲全州並
有賊船五十餘隻分爲水陸兩路意欲直撲永
州又探得該匪一竄義甯一竄永福此股首逆
係名羅亞旺約有五千餘人查永州水陸兩途

均緊與全州接壤水路尤爲迅捷江永防兵分
布要隘兵力本不甚厚又經兩次抽撥赴粵應
援現調湖北之兵因道遠刻難趕至賊氛猝近
實覺單薄堪虞查零陵縣屬之黃沙河係由全
至永水路要道臣本派有防兵四百名今恐不
敷又於附近酌撥二百名共資堵截並飛飭該
帶兵官先將潯泊各船全行撤歸楚岸一面在

兩岸設備槍礮一遇賊船卽行奮力轟擊提臣
鮑起豹駐紮江華現距賊蹤稍遠飛咨移紮永
郡相機策應正在布置閒適接署廣西提臣劉
長清來函已與總兵王錦繡等行抵興安之巖
關口擬卽徑詣全州因全州爲楚南門戶如得
固守則永郡可保無虞臣又飛咨迅速馳往兜
剿並咨商賽尙阿仍飭余萬清迅赴全州一同

守禦卽使該逆竄楚而提臣劉長清等旣跟蹤追捕楚省又迎頭堵截似可腹背夾攻臣當殫竭心力防勦兼施斷不敢稍事疏懈奏入

上命軍機大臣傳諭程喬采駱秉章曰湖南永州水陸兩路均與全州接壤水路尤爲迅捷此時湖南防堵緊要該督現已添調官兵並飛咨鮑起豹移兵永州著卽督飭文武分路嚴防水路船隻業經全撤並於

兩岸設備如遇賊船竄入務須併力堵截儻此處稍有疏虞賊得揚帆順流而下勢更蔓延劉長清王錦繡等馳赴全州恐未能繞出賊前余萬清本係留楚防堵之員如能折赴全州禦賊尙可保固楚南門戶儻賊竄楚境卽著與劉長清等分投夾擊毋稍延誤該督前調湖北之兵著卽飛催趕到前已諭令四川總督徐澤醇選備精兵二千名聽候廣西調遣此時

湖南防剿緊要著該督酌量情形如須調用卽著飛
咨四川催令迅速赴楚以備攻剿至衡永一帶會匪
仍應督飭地方官加意豫防毋令暗相勾結地方紳
民尤須勸令實力團練互相保衛不惟禦外來之賊
兼可防本境之匪總在該督撫等相機籌辦俾衆志
成城庶幾有備無患

上又命軍機大臣傳諭賽尙阿曰湖南永州水陸兩途

均與全州接壤水路尤爲迅速湖南官兵屢次調撥
赴粵兵力較單現調湖北各兵亦難剋期趕到此時
湖南防剿緊要所有前備調四川兵二千名已諭令
程喬采酌量催調赴楚矣此股匪徒盡在全州一路
其由西路廟頭墟分竄之賊究有若干賊首羅亞旺
外其餘洪秀泉等各賊首又復竄往何處該匪旣由
江東扯綫路北走興安其平樂富賀一帶是否仍形

喫重余萬清統帶重兵由桂林進追現在行抵何處
著賽尙阿飛飭各員迅速應援合力夾擊毋稍延誤
賊衆大股全奔楚境桂林業已解圍且有巡撫坐鎮
省垣值此追剿喫緊之時向榮仍守省城置之空閒
之地豈不坐失機宜著該大臣體察情形何處最爲
緊要卽飭向榮帶兵前往相機剿辦並可堵賊回竄
之路該大臣此時是否仍紮陽朔抑已移營扼要處

所軍情緩急應變制宜想必自有斟酌也

二十三日癸卯徐廣縉葉名琛奏言羅鏡凌十八

雖已窮蹙而黨固心堅拌命抗拒惟廣西省垣
被圍日久待援孔殷較之羅鏡尤爲可慮若果
指日準可埽穴擒渠臣徐廣縉自應一手經理
再赴廣西儘時勢中變難以懸擬臣葉名琛當
卽出省前往接辦以便臣徐廣縉迅速起程馳

聞

赴兩省要隘地方相機堵剿萬不敢稍有遷延
奏入報

同日鄒鳴鶴奏言向榮日夜與臣共守危城已
踰月三月二十七日夜間賊用呂公車攻城
其勢十分危急幸臣先期設備向榮憑城指揮
自丑至卯在槍礮叢中竭力抵禦益形勞瘁次

晨卽脇痛寒熱交作迄今氣喘不止其年已踰
六旬精神疲乏勢難力疾乘騎星馳就道並據
城內紳民環顧以向榮兼程赴救民獲再生現
在賊匪雖竄深恐奸謀百出詐去復來必得向
榮留城坐鎮民心庶可安定情詞甚屬迫切自
應俯順輿情藩司勞崇光業於三十日行抵陽
朔張國樑亦卽日可到臣已馳函賽尙阿籌商

以該藩司所帶壯勇多係生力或竟令統領追
勦各軍調撥進攻必可得力目前省城解圍搜
查附近各村並無藏留餘孽所有四門四郊應
行趕辦之事如修理被擊城垛搜尋賊遺礮械
激勵四鄉練衆分別裹脅罪犯均已趕緊舉辦
奏入

上命軍機大臣傳諭賽尙阿鄒鳴鶴曰廣西省城旣已

解圍賽尙阿已由陽朔回省與該撫會商防守自可
無虞疏失惟逆匪全數奔竄楚粵交界情形極爲緊
要且湖南兵力單薄全賴粵軍大隊追擊合力兜剿
現在劉長清等帶兵前往余萬清亦折回楚境仍恐
賊股猖獗我兵不敷策應向榮現因脇痛暫緩出省
該提督受恩深重具有天良想不肯藉詞株守省城
坐失事機也前此廣西省城被圍湖南鎮將趕卽帶

兵赴援此時自以援勦楚界之賊爲要著賽尙阿體
察情形隨時調度撥兵分路追勦毋任逆匪竄越鄰
境

二十六日
丙午賽尙阿奏言接據各路探報賊係

全股竄由關雞潭等處過河復由靈川縣屬之
靈田圩奔興安縣屬之海陽坪爲興安靈川灌
陽臨桂恭城等屬交通之處而興安尤爲切近

先期派令張國樑壯勇卽由沙子街取道灌陽
以趨興安迎頭堵截並飭李能臣將所帶博白
壯勇卽由臨桂取道興靈追剿余萬清帶新到
楚兵千名江忠源帶楚勇一千二百名劉長清
率奚應龍帶廣西兵七百名提標三項壯勇一
千名王錦繡帶雲南兵九百餘名秦定三常祿
帶貴州兵五百名及博白勇一千五百名虎嵩

林帶川兵六百餘名分投迎截追剿賊於初四
日竄至興安入城焚掠卽出城屯紮劉長清等
兵追至興安之巖關口擇要紮營正與秦定三
王錦繡商同進剿適余萬清常祿亦同時趕到
當卽會商分兵三路前擊後襲秦定三江忠源
由西小路出爲頭敵余萬清李瑞王錦繡由中
路進劉長清常祿虎嵩林由東大道進探得賊

復全夥竄往興全連界之唐家司而去初五日
劉長清等兵勇追至離唐家司五里之瓦子鋪
該逆分股搖旗吶喊繼擁而來劉長清與余萬
清督率將士奮力齊擊該匪拚死拒敵鏖戰四
時之久斃賊百餘人秦定三江忠源等兵勇由
小路出碎井頭距唐家司五里許一面紮營一
面撥兵豫防賊撲並於山衝內之蛇嶺地方設

伏該逆果卽分股來撲約千餘衆秦定三督同
遊擊嚴承恩及江忠源等誘賊至伏突起猛擊
該逆敗走半分水陸兩路往全州逃逸半回唐
家司分夥盤踞各村莊要路抗阻初六日該逆
復由唐家司竄至全州之界首地方又聞賊於
水路之鎮安司鳳凰嘴等處游弋旋又探報賊
船已抵全州四五十號該州先有官兵架礮堵

守河面賊船不能前進賊又於全州對河紮營
分起往各村莊擄掠全州城內及城北門外均
有兵練防守又有湖南交界黃沙河地方防兵
至全幫同守禦又據向榮稟據劉長清函報該
逆竄攻全州勢甚猖獗我兵大隊行走稍緩恐
未能迎頭攔擊當與余萬清商同將未到之楚
兵四百名截留全州城內並札調楚粵交界之

黃沙河練勇亦至州城初七日探得賊匪後隊
已過覺山其前隊現在圍攻州城劉長清等暫
於覺山紮營賊之後隊午刻亦至州城現在分
踞城外東南兩門船上及西門外盤石腳飛鸞
橋北門外等處安設大礮晝夜轟擊幸所截留
楚兵先期馳抵州城與城內營兵團練合力晝
夜防守逆匪未能攻入城外附近民房均已拆

毀查全州西門必由飛鸞橋進盤石腳其盤石
腳山臨河小路僅容一人行走逆賊已於此處
安設大礮而北門前有兩河每處僅有渡船一
隻往來撐駕大兵更難遙渡現擬自覺山拔營
仍由西門一路至魯班橋地方紮營先將飛鸞
橋盤石腳奪回再行相機進紮臣前聞賊至興
安已皆全夥北向南路陽朔一帶去賊漸遠卽

於初七日由陽朔拔營晉省初八日行抵省城
接見地方官紳及帶兵文武僉稱向榮倍道赴
援保障全城厥功甚偉現在身發寒熱城中紳
士呈懇留在省垣已由撫臣附奏開隆阿亦因
在軍營日久身受潮溼右臂麻木囑令暫留大
營養息俟痊愈時再爲差遣查全州地方形勢
爲粵西門戶與湖南緊相連界設再被逆賊衝

過乘勢竄越楚境楚省防禦稍疏則更難於收
拾臣到省後卽將陽朔帶來湖北雲南等兵千
餘名派總兵經文岱副將巴圖管帶立卽拔營
前進並將現在駐省之四川貴州廣西官兵二
千餘名派副將明安泰等管帶赴興全一帶追
剿合計派出各兵三千九百餘名均已嚴催卽
日起程緣省城原派追剿官兵七千餘名暨續

派潮勇三千餘名實恐不敷勦辦原留守城之
楚兵一千五百名並東勇良勇撫臣均留在北
門外分紮此外尙有臣自陽朔帶來守營兵千
餘名由向榮分布守禦惟向榮旣病且爲省垣
留鎮未克前進各路追勦兵勇必須統率有人
查湖南綏靖鎮總兵和春有謀有勇兵心畏服
派充翼長前往統領諸軍提督余萬清本係奏

留楚省防堵之員現在賊竄全州緊接楚省防務喫緊已令仍回湖南督辦防堵其所帶楚兵卽交和春管帶勞崇光新募之宣化鬱林等勇尙未到齊張國樑帶勇由灌陽馳赴全州此項壯勇當可繞越賊前迎擊初十日勞崇光亦由陽朔晉省當卽派充翼長與和春會督諸軍速籌勦辦並飭各帶兵勇文武悉聽指揮惟該布

政使總兵階資與諸將相等恐未足資統率請
將勞崇光加巡撫銜和春加提督銜俾諸將咸
知震服現在賊竄全州臣當卽由省城酌量移
營前進並派許祥光帶領爬船由水路趨發飭
勞崇光姚瑩一同前往俟臣定期移營仍將陽
朔帶來守營兵千餘名帶領前行

賽尙阿又奏言此次賊竄之後撫臣鄒鳴鶴將

城門緊閉仍留勁兵坐守所派追兵僅止七千
餘名賊係全夥竄由一路不敷剿辦臣入省見
撫臣告以追剿必須添派得力之軍現在城守
稽查自應嚴密勿懈而城門亦漸可酌開其城
外東勇良勇等旣難令其追賊亦可漸爲裁撤
該撫謂楚兵一千五百名分布西門南門文昌
門三處城上最爲得力萬不可少未便調遣出

外城廂內外逐日仍拏有奸細恐其大夥潛入城門斷不敢輕開城外兵勇現在僅餘東勇二千餘名良勇香山勇二千餘名開隆阿所帶之兵勇一千數百名此三營兵勇不過六七千人必得留護省垣俟賊痛勦淨盡後再行酌裁等語臣聞賊由永安撲省城時城中慌亂已極毫無布置若使向榮帶兵遲到數時則賊先至城

下城守殆不可問省城重鎮之地猶賴此勁兵
驍將馳救得全其他府縣一切守禦自更不如
省城乃當賊蹤飄忽之際所有得力兵將撫臣
堅議留守省城斷難強派前往追剿卽城外所
紮兵勇其數幾與派出追兵相等亦必俟賊剿
盡始能酌撤僅以劉長清等兵數千當賊全夥
奔突追剿豈能得力現在全州雖未撲入聞賊

已將城外房屋燒燬將由水陸奔赴湖南永州
一經踰越楚境逆燄愈張勢必更難戡事不料
封疆大吏不能籌顧大局專以目前自衛希圖
自免至向榮久歷戎行詳察其人材勇本屬可
用到粵以來勦賊功績最多粵人稱頌輿論翕
然惟其馳驅日久備極辛勞且其用兵能勝而
不能敗一經挫折時時輒思引卸臣用之一載

朝夕策勵此次帶兵馳救省城猶能倍道星馳精神奮發到省一月力籌守禦城中士庶感戴益深惟每及追勦一節則自稱老病誘卸多方臣親往存視其病實未大爲委頓經臣拊循慰問亦竟未能慷慨力疾請行實再難強之使出惟當事局屢更凡此多方掣肘不敢不披瀝以陳奏入

上命軍機大臣傳諭賽尙阿曰賊竄興安全州向榮身受厚恩值此事機喫緊豈坐觀成敗之時該提督前次帶兵馳救省垣力籌守禦朕方念其勤勞倚以破賊乃當匪衆全數北竄亟須追剿輒又稱病不出與巡撫林守省城豈素號勇敢者固如是耶著該大臣傳知該提督一俟病痊卽督兵前往剿賊現在興安全州被賊攻撲而全州地方形勢爲粵西門戶與湖

南緊相連接設使逆賊豕突狼奔竄入楚境懲創愈難賽尙阿業經分派鎮將督帶兵勇分投追剿仍當通盤籌畫謀出萬全趁賊蒼黃未定之時與鄰境合力夾擊或可一鼓殲擒毋令越境滋擾

上諭內閣曰廣西省城解圍後賊匪竄擾興安全州經劉長清余萬清等分帶各路兵勇追擊現在賽尙阿已由陽朔進省著卽分飭帶兵大員迅速接應與楚

省文武合力攻剿毋令蔓延向榮患病不能出省諸
軍無所統率湖南綏靖鎮總兵和春著賞加提督銜
帶兵進剿廣西巡撫鄒鳴鶴身任封疆於賊匪攻撲
省城之初城外象鼻山將軍橋等處險隘均無準備
致爲賊踞所辦團練亦無實效疊次飛章入告桂林
一城之外全未計及朕卽覺其張皇失措一籌莫展
若非向榮赴省守禦幾誤事機此次賊匪北竄又欲

將猛將精兵留以自衛株守省城實屬怯懦無能大
負委任鄒鳴鶴著卽革職以示懲儆廣西巡撫著勞
崇光補授

同日軍機大臣刑部會奏言逆犯洪大泉押解
到部奉

旨著軍機大臣會同刑部嚴審定擬具奏臣等遵
旨將該犯提訊據供認從逆踞城抗殺官兵等情屬實

緣洪大泉籍隸廣東南海縣自幼跟隨胞叔洪雲秀在湖南衡陽縣讀書旋披薙爲僧閱看兵書潛蓄異志咸豐元年二月閒洪大泉前往廣東一帶地方閒蕩與洪秀泉夥黨胡以洸會遇胡以洸引至賊營與洪秀泉見面彼此投契結拜弟兄維時洪秀泉夥黨有馮雲山韋政卽韋昌輝蕭潮濱楊秀青石達開秦日昌賴漢英曾

四朱錫琨曾玉秀羅大綱卽羅亞旺並胡以洸
等藉添弟會名目裹脅賊匪到處搶掠財物屢
與官兵打仗俱係洪大泉主謀洪大泉又自領
賊匪與官兵打仗三次洪秀泉僭稱爲僞太平
王封洪大泉爲僞添德王馮雲山等俱受僞封
閏八月初一日逆夥韋政等攻破永安州城與
官兵抗拒後因四路接濟不通官兵圍攻甚急

起意竄逃本年二月十六日燒燬民房乘便衝
出韋政等擁護洪秀泉帶領賊匪五千餘人與
洪大泉一併逃竄十八日走至鬱叢山地方被
官兵追擊經守備全玉貴將洪大泉拏獲查洪
大泉投入洪秀泉賊營代爲主謀抗拒官兵攻
破永安州城復受僞封實屬罪大惡極合依謀
反大逆不分首從凌遲處死律凌遲處死梟首

示衆奏入得

旨洪大泉著卽凌遲處死梟示派刑部左侍郎書元署
右侍郎陸應穀前往監視行刑

二十八日戊申鄒鳴鶴奏言逆匪自四月初二日

丑刻向東北之靈田圩竄去翻越山嶺至興安
縣屬之海陽坪晝夜狂奔初四日突有一股數
百人衝入興安縣城焚劫衙署監獄署興安縣

商昌本在南鄉集團得信後率衆趕回適省城
派往官兵踵至奮力追擊該匪隨即出城走避
官兵追至巖關口紮營出兵三路分追賊已全
夥竄往興安全州交界之唐家司一半分水陸
兩路逃往全州一半向唐家司盤踞各村要路
抗阻初六日由唐家司竄赴全州之界首地方
追至德水圩探聞賊船四五十號已到鎮安司

鳳凰嘴一帶旋即駛至全州城外分赴各村莊
擄掠初七日諸軍馳抵覺山賊之前隊先至州
城圍攻其後隊亦踞城外東南兩門船上及西
門外盤石腳並北門外等處設有大礮晝夜轟
擊查全州爲粵西門戶緊接湖南之零陵道州
東安等州縣必須乘此賊匪喘息未定前截後
追杜其竄越入楚之路初六日催令前總兵李

能臣委員朱啟仁等帶壯勇三千名趕往初七
日復派守城之潮勇三千名趕往賽尙阿初八
日進省後又經飛催原派官兵復益以帶來湖
北雲南各兵及原駐省城之四川貴州廣西各
兵共三千九百餘名跟蹤追剿統計前後兵勇
已及一萬七千餘名再益以張國樑生力軍三
千餘名當可痛加懲創興安全州均係桂林府

屬距省甚近山徑處處可通且東鄉海陽坪一帶近有土匪更恐乘機剽掠是以臣與賽尙阿反復商推請將楚兵一千五百名仍行留省就原駐之文昌門西門南門三要地防守而以前留之良勇東勇分駐城外梭織巡查九門中惟開水東門一處其餘八門仍舊暫閉並擬於西南文昌三門及飛龍橋等處擇要建設敵樓礮

臺以期有備無患至此次興安縣城雖未失陷
乃被賊匪衝入焚劫究屬防守不力應請將署
興安縣事棟發知縣商昌先行革職一面委員
馳赴接署仍責令商昌會同接署之員幫辦堵
禦事宜不得置身事外奏入

上諭內閣曰廣西署興安縣事棟發知縣商昌於大股
逆匪衝入縣城焚劫之時該員雖在鄉團練究屬防

守不力商昌著先行革職毋庸留辦防堵仍著勞崇
光確查賊匪竄擾實在情形及同城文武有無遇賊
退避情事據實具奏